

掃葉叢書



周易注疏卷第二



國祭酒上護軍曲阜縣開國子臣孔穎達奉

勅撰

坤下坤元亨利牝馬之貞

注云坤貞之所利利於牝馬也馬在下而

也而又牝焉順之至也至順乃亨故唯利於牝馬之貞

君子有攸往先

姚廣孝集

二



創于1897

商務印書館

The Commercial Press

黃苗子郁風基金會贊助

姚廣孝集二



創于1897

商務印書館
The Commercial Press

二〇一六年·北京

【作者簡介】

姚廣孝，長洲人，元元統三年（乙亥，公元一三三五年）生，本醫家子。年十四度為僧，名道衍，字斯道。洪武中，高后馬氏喪，太祖選高僧侍諸王，宗泐舉薦道衍。燕王朱棣與語甚合，請隨至北平，主持慶壽寺。太孫建文帝立，道衍遂密諫燕王舉兵，號曰勤王。四年後，燕王立，錄功第一，拜太子少師。復其姓，復髮，賜名廣孝。永樂十六年（戊戌，公元一四一八年）三月戊寅卒，年八十四。追贈推忠輔國協謀宣力文臣、特進榮祿大夫、上柱國、榮國公，諡恭靖。姚廣孝是明初政壇一位舉足輕重的人物。

【內容簡介】

《姚廣孝集》是《中國古典數字工程叢書》——《掃葉叢書》之《萬人集》中的一部。姚廣孝現存著作有《逃虛子詩集》十卷、《逃虛類稿》五卷、《獨菴外集續稿》五卷、《道餘錄》、《淨土簡要錄》、《諸上善人詠》等，約二十餘萬字。此次新輯詩文約三萬字。另外，史證《永樂大典》和《太祖實錄》均由姚廣孝總成其事。依照錢鍾書先生為本叢書設定的規則，《永樂大典》屬類書，正文不收，而《永樂大典凡例》和《太祖實錄》應同時收入新書《姚廣孝集》和《朱棣集》。《姚廣孝集》全書近一百四十萬字，可方便讀者重新認知和研究姚廣孝其文其人。

姚廣孝集卷二十八

明太祖實錄卷之一·壬辰二月至甲午十月

監修官 資善大夫太子少師臣姚廣孝 資政大夫戶部尚書臣夏原吉

總裁官 文淵閣大學士兼左春坊大學士奉政大夫臣胡廣等奉 敕修

大明太祖。聖神文武欽明啟運俊德成功統天大孝高皇帝。姓朱氏。諱元璋。字國瑞。濠之鍾離東鄉人也。其先帝顓頊之後。周武王封其苗裔於邾。春秋時子孫去邑為朱氏。世居沛國相縣。其後有徙居句容者。世為大族。人號其里為朱家巷。高祖德祖。曾祖懿祖。祖熙祖。累世積善。隱約田里。宋季時熙祖始徙家。渡淮居泗州。父仁祖。諱世珍。元世又徙居鍾離之東鄉。勤儉忠厚。人稱長者。母太后陳氏。生四子。上其季也。方在娠時。太后常夢一黃冠自西北來。至舍南麥場。取白藥一丸置太后掌中。有光起。視之漸長。黃冠曰。此美物可食。太后吞之。覺以告仁祖。口尚有香氣。明日上生。紅光滿室。時元天曆元年戊辰九月十八日子丑也。自後夜數有光。鄰里遙見。驚以為火。皆奔救。至則無有。人咸異之。常邁疾。抱之佛寺。寺無僧。復抱歸。見室東檐下一僧面壁坐。顧仁祖曰。來。乃以手撫摩上頂。旦日。疾遂愈。後復疾。仁祖念前夢之異。欲俾從釋氏。不果。既而徙居鍾離之西鄉。後遷太平鄉之孤莊村。太后常謂仁祖曰。人言吾家當生好人。今吾諸子皆落落不治產業。指上曰。豈在此乎。及上稍長。姿貌雄傑。志意廓然。獨居沉念。人莫能測。既就學。聰明過人。事親至

孝。侍奉左右不違意。一日黎明。仁祖坐於東室檐下。上侍側。有道士長髯朱衣。持簡排垣柵直入。遽揖仁祖曰。好箇公公。八十三當大貴。仁祖初見道士突入。頗不悅。聞其言異。乃留之茶。道士不顧而去。既出門不見。時莫知所謂。及上即位。追上尊號。推其年數。適符其言。歲甲申上年十七。值四方旱蝗。民饑。疾癘大起。四月六日乙丑。仁祖崩。九日戊辰。皇長兄薨。二十二日辛巳。太后崩。上連遭三喪。又值歲歉。與仲兄極力營葬事。既葬。念仁祖太后常許從釋氏。乃謀於仲兄。以九月入皇覺寺。僅五十日。寺僧以食不給。散遣其徒遊四方。上遂西遊至合淝界。遇兩紫衣人。欣然來就。約與俱西。數日上忽病寒熱。兩人解衣覆上身。夾侍而臥。調護甚至。病少差。復強起行。行數日至一浮圖下。兩人者辭去。謂上曰。姑留此待我三日。後三日疾愈。兩人亦不至。上心異之。及行至六安。逢一老儒負書篋。力甚困。上閱其老。謂曰。我代翁負。老儒亦不讓。偕行至硃砂鎮。共息槐樹下。老儒謂上曰。我觀貴相非凡。我善星曆。試言汝生年月日為推之。上具以告。老儒默然良久曰。吾推命多矣。無如貴命。願慎之。今此行利往西北。不宜東南。因歷告以未然事甚悉。上辭謝之。老儒別去。問其邑里姓字。皆不答。上遂歷游光固汝潁諸州。凡三年。時泗州盜起。列郡騷動。復還皇覺寺。上所居室夜復數有光。僧皆驚異。

辛卯夏五月。汝潁兵起。

壬辰春二月乙亥朔。定遠人郭子興孫德崖及俞某魯某潘某等起兵。自稱元帥。攻拔濠州。據其城守之。辛丑。亂兵焚皇覺寺。寺僧皆逃散。上亦出避兵。日暮。上歸。念無所逃難。甚憂之。乃禱于神。

曰。今兵難如此。吾欲出避兵。志無所定。願于神卜之出與處孰吉。明以告我。祝已投卜。凡三俱不吉。上曰。出與處既不吉。無乃欲吾從雄而後昌乎。一投卜而吉。上自念曰。今豪傑紛紛。孰堪與禦亂者。況從雄非易事。乃復祝曰。兵凶事。從雄吾甚恐。盍許以避兵。復投卜玃躍而立。上知神意必欲從雄也。固守以待。未旬日。有故人自亂雄中以書來招曰。今四方兵亂。人無寧居。非田野間所能自保之時也。盍從我以自全。上覽畢即焚之。數日。復有來告曰。前日人以書招公。傍有知者。欲覺其事。當柰何。上慨然太息曰。吾惟德命于天耳。後三日其人果至。與語辭色無相害意。乃謝遣之。復旬日。又有來告曰。先欲覺者不欲自為。今屬他人發之。公宜審禍福。決去就。是時元將徹里不花率兵欲來復濠城。憚不敢進。惟曰掠良民為盜。以徼賞。民皆恟恟。相扇動不自安。上以四境逼迫。訛言日甚。不獲已。乃以閏三月甲戌朔旦抵濠城入門。門者疑以為謀。執之欲加害。人以告子興。子興遣人追至。見上狀貌奇偉異常人。因問所以來。具告之故。子興喜。遂留置左右。尋命長九夫。常召與謀事。久之甚見親愛。凡有攻討。即命以往。往輒勝。子興由是兵益盛。初宿州閔子鄉人馬公素剛直。重然諾。愛人喜施。避仇定遠。與子興為刎頸交。馬公有季女。甚愛之。常言術者謂此女當大貴。及遇亂。謀還宿州起兵應子興。以女託子興曰。幸公善撫視。子興許諾。與其妻張氏撫之如己子。已而馬公死。子興感念不已。上時未有室。子興欲以女妻上。與張氏謀曰。昔馬公與吾相善。以女託我。今不可負。當為擇良配。然視眾人中未有當吾意者。因言上度量豁達。有智略可妻之。張氏曰。吾意亦如此。今天下亂。君舉大事。正當收集豪傑與成功業。一旦彼或為他人所親。誰與共成事。

者。子興意遂決。乃以女妻上。即孝慈高皇后。時孫德崖等四人起自農畝。性驢戇。智識皆出子興下。子興易視之。每議事獨與四人異。四人多不悅。協謀傾子興。子興時多家居少公會。每視事四人當先至待子興。及子興至。謀不合輒起去。四人乃專決之。自是會集日簡。或數日始一會。會則四人瞠目視子興。子興不自安。謂上曰。諸人若此奈何。上曰。此無他。乃簡會至是耳。子興曰。然。明日即出同視事。未數日復家居不出。自是意愈不協。互相猜防。是歲九月。元兵復徐州。徐帥彭早住趙均用率餘眾奔濠。德崖等納之。二人本以窮蹙來奔。德崖等四人與子興反屈己下之。事皆稟命。遂為所制。早住頗有智數。擘權專決。均用但唯唯而已。子興禮早住而易均用。均用亦銜之。德崖等四人遂與均用謀。伺子興出。執之通衢。械于孫氏將殺之。上時在淮北。聞難亟歸。道遇故人。止之曰。郭公已被執。并欲執公。且勿往。上曰。郭公于我恩厚。有難不救非義也。何丈夫之為。乃馳至郭氏。惟見婦女。問其諸子安在。婦疑不以告。上曰。我豈外人而乃疑我。今來謀脫公難也。諸婦乃告以實。上曰。我公素厚彭而薄趙。禍必趙發。此非彭不可解。乃與子興二子往訴于早住。早住怒曰。我在此。誰敢爾。即會左右呼兵以出。上亦被甲持短兵。與俱至孫氏。圍其家發屋而入。見子興鉗繫幽窖中。肌肉皆傷。乃破其械。使人負以歸。子興遂得免。

○是冬元將賈魯與月哥察兒圍濠城。城中極力拒守。

癸巳春。元將賈魯死。

夏五月壬午。元兵解圍去。城中乏糧。人艱食。上以鹽易米于懷遠歸。贍子興家。

乙未 張士誠據高郵。

○彭趙二帥既據濠州。挾德崖等為己用。是春。早住自稱魯淮王。均用稱永義王。

六月丙申朔 濠城自元兵退。軍士多死傷。上乃歸鄉里募兵。得七百餘人以還。子興喜。以上為鎮撫。○是時彭趙二人馭下無道。所部多暴橫。上觀其所為。恐禍及己。乃以七百人屬他將而獨與徐達等二十四人南去略定遠。中途遇疾復還。半月。疾始間。聞戶外有杖策嘆嘖而過者。上問故。左右告曰。定遠張家堡有民兵。號驢牌寨者。孤軍乏食。且無所屬。欲來降。猶豫未決。主帥將遣人招之。念無可行者。故惋恨耳。上矍然曰。此機不可失也。即強起。詣子興請行。子興喜曰。吾固知非爾不能辦此。然爾疾方愈。奈何。上曰。此豈高枕養病時耶。今失機不圖。將為他人所得。子興曰。須人幾何。上曰。人多則彼疑。十人足矣。乃選騎士費聚等二人。步卒九人從行至定遠界。上病暑。再越六日。至寶公河。隔水望其營。營中見上至。勒兵以待。步卒懼。欲走還。上謂曰。彼眾我寡。走將安之。且彼縱騎以躡我後。必不能免。汝等且勿恐。但隨我入其營。觀其從違。頃之。營中遣二將出逆。舉手大呼曰。來者為何。上遣人答曰。自濠來與主帥議事。二將歸告其帥。復出曰。請下馬。上下馬。以久病。步行甚艱。前阻水。費聚見彼疑。慮有他。欲代上渡水而往。上曰。今與君至此。禍福共之。豈可代耶。乃同往。既至。其帥出逆曰。公遠來郭公必有所命。上曰。郭公與足下有舊。聞足下軍艱食。他敵欲來攻。特遣吾相報。能相從即與俱往。否則移兵避之。其帥許諾。請留物為信。上解所佩香囊與之。彼以牛脯為獻。謂上曰。請帥從者先還。俟諸軍趣裝。即詣軍門。上將還。慮其

不誠。留費聚伺之。後三日。聚還告曰。事不諧矣。彼且欲他往。上即率兵三百人。復抵其營。謂之曰。汝為人所凌怨。尚未復。今從我而北。恐不能釋憾于彼。我助汝兵。可以報之。帥且諾且疑。然設備甚至。上觀其情狀非可以言論。謀以計取之。適里人有勇力者在行。上謂曰。吾欲用爾能乎。曰。惟命是聽。乃密告以計。使往誘其帥來會。潛約我眾。俟其至則聚而觀之。既聚復開。如是者三。即於眾中縛之。既而其帥至。眾如約。遂縛之。令壯士五十人擁之以行。其營中不知也。行十餘里。乃遣人喻其營中曰。爾帥已往觀營地。可移軍來就。于是營中兵皆出。即焚其營壘。悉驅其眾以還。得壯士三千人。後七日。率之而東。夜襲元知院老張于橫澗山。黎明。入其營。老張棄軍遁去。降其民兵男女七萬。得精壯二萬。悉加訓練。上喻之曰。爾眾初非不多。一旦為吾所有。何也。蓋將無紀律。士不素練故爾。今練習爾等者。欲令知紀律也。宜共戮力以建功業。眾皆羅拜曰。唯公所命。于是率之南略滁陽。道遇定遠人李善長來謁。上與語悅之。留置幕下。俾掌書記。語之曰。方今群雄並爭。非有智者不可與謀議。吾觀群雄中持案牘及謀事者多毀左右將士。將士弗得效其能。以至于敗。其羽翼既去。主者安得獨存。故亦相繼而亡。汝宜鑒其失務。協諸將以成功。毋效彼所為也。善長頓首謝曰。謹受命。遂與俱攻滁陽。下之。未踰月。彭早住趙均用遣人邀上將兵守盱泗。上以二人驪暴淺謀。不可與共事。辭弗往。未幾。二人自相吞併。戰士多死。早住亦亡。惟均用專兵柄。狼戾益甚。子興勢孤。上聞而憂之。遣人說均用曰。方今海內淆亂。正收攬英雄之日。公昔窘于元兵。奔濠城。約與郭公共守以抗元兵。郭公開門延納。推誠相待。既不見疑。又屈己以事公。郭公之德于

公甚大。公乃不思報。反聽左右之言。欲先圖之。是自翦其羽翼。失豪傑心。且吾聞之。有德不酬。是謂悖德。有恩不報。是謂孤恩。悖德孤恩。丈夫不為。又況人心難以逆料。郭公雖或可圖。其部屬猶眾萬。一事有不然。公亦豈能獨安。莫若善待之。使各守其所。唇齒相依。計之上也。不然。唇亡齒寒。吾竊為公不取時。均用聞上入滁州。兵勢甚盛。心頗恐。待子興稍以禮。上又使人賂其左右。以解之。子興乃得免。遂將其所部萬人至滁州。閱上所將兵三萬餘。號令嚴明。軍容整肅。乃大悅。居再閱月。子興惑于讒意。始疑上。悉奪左右任事者。又欲拔李善長置麾下。善長弗肯行。涕泣訴于上。上曰。主帥之命。弗可違也。善長終不肯去。久之。弗復召。乃止。自是四方征討總兵之權。上皆不得與。上雖見踈遠而事子興愈恭。未嘗有怨言。既而元兵圍滁。有任某者忌上功。譖于子興云。上每戰不力。子興頗信之。令與任某俱出城接戰。任出城未十步。即被矢走還。上猶直前奮擊。眾皆披靡。上徐還。了無所傷。子興乃愧歎。又常與三百人出城。顧聞鶉鴿聲。飛矢墮空中。心異之。遽還。俄而敵兵驟至。無所獲而去。上每遇敵。智勇奮出。身先士卒。故所向克捷。凡軍中有所得。上皆無取。輒令分給群下。他將有所獲。輒以獻子興。子興以上無所獻。頗不悅。故讒言得以間之。孝慈皇后知其意。後將士有獻者。后悉以遺子興妻張氏。張氏喜。后又和順以事之。由是疑釁漸釋。

甲午春正月甲子朔 張士誠國號大周。自稱誠王。改元天祐。

秋七月。滁大旱。上憂之。滁人楊元杲曰。滁之西南豐山陽谷栢子潭有龍祠。水旱禱之輒應。既禱。或魚躍。或鼃鼃浮。皆雨兆也。上聞即齋沐往禱。禱畢。立淵西崖。久之。無所見。乃彎弓注矢。祝

曰。天旱如此。吾為民致禱。神食茲土。其可不恤民。吾今與神約。三日必雨。不然。神恐不得祠于此也。祝畢。連發三矢而還。後三日。大雨如注。上即乘雨詣祠謝。是歲滁大熟。

冬十月。元將脫脫攻高郵。分兵圍六合。六合遣使求救。其使者與上有故。中夜至。上聞之即起。隔門與語。請諸子興開門納之。子興與其帥有隙。怒不發兵。使者訴其情甚急。子興不答。上謂子興曰。六合受圍。無救必斃。六合既斃。次將及滁。豈可以小憾而棄大事。子興聞上言。意少解。欲遣他將率兵以行。時元兵號百萬。諸將畏之莫敢往。皆託以禱神弗吉為辭。子興乃召上將兵往。亦令禱于神。上曰。事之可否。當斷之于心。何必禱也。于是率師東之六合。與耿再成守瓦梁壘。元兵攻之急。每日暮攻壘。垂陷。復去之。明旦。復完壘。與戰如是數四。上以計紿之。乃斂兵入舍。備糗糧。遣婦女倚門戟手大罵。元兵相視錯愕。環壘不敢逼。遂列隊而出。牛畜婦女居前。丁壯翼之。徐引而去。元兵不敢近。遂還滁州。既而元兵大至。欲攻滁。上乃設伏澗側。令再成佯走誘之。度澗伏發。皆下馬走。城中鼓譟而出。元兵大敗。獲其馬甚眾。是時雖勝。然元兵尚強。恐益兵來攻。上謀歛其師。乃具牛酒。斂所獲馬。遣父老送還。令告其帥曰。城主老病不任。行謹。遣犒軍。城中皆良民。所以結聚。備他盜耳。將軍以兵欲獮戮之。民固畏死。非得已也。將軍幸撫存之。惟軍需是供。今高郵巨寇未滅。非併力不可。奈何舍寇分兵攻良民乎。其帥信之。謂其眾曰。非良民。豈肯還馬。即日解去。由是滁城得完。

○上以四方割據稱雄者眾。戰爭無虛日。又旱蝗相仍。人民饑饉。死者相枕藉。心甚憂之。乃禱于天

曰。今天下紛紛。群雄並爭。迭相勝負。生民皇皇。墜于塗炭。不有所屬。物類盡矣。願天早降大命以靖禍亂。苟元祚未終。則群雄宜早息。某亦處群雄中。請自某始。若元祚已終。群雄之中。當膺天命者。大命早歸之。無使生民久阨危苦。存亡之幾。驗于三月。及踰三月。上兵益盛。

○時子興名稱尚微。且無意遠略。但欲據滁自王。上察知其意。因說曰。滁。山城也。舟楫不通。商賈不集。無形勝可據。不足居也。子興默然。事遂止。

○上姊夫李貞携其子保。保自淮東來見。上以姊早歿。見之甚喜。因養為己子。俾姓朱氏。更名文忠。教之讀書。常使居左右。隨侍出入。雖馬上。亦隨事誨之。文忠時年始十四。

大明太祖聖神文武欽明啟運俊德成功統天大孝高皇帝實錄卷之一

姚廣孝集卷二十九

明太祖實錄卷之二·乙未正月至三月

乙未春正月戊午朔。滁師乏糧。諸將謀所向。子興言計多失。上數諫之。子興不聽。上鬱鬱。因致疾。一日。議出師。遣人召上。上以疾辭。召至再三。乃力疾往。子興命定計。上曰。困守孤城。誠非計。今欲謀所向。惟和陽可圖。然其城小而堅。可以計取。難以力勝。子興曰。何如。上曰。向攻民寨時。得民兵號二。其文曰。廬州路。義兵今擬製三千。選勇敢士椎髻左衽。衣青衣。腹背懸之。佯為彼兵。以四橐駝載賞物。驅而行。使人聲言。廬州兵送使者入和陽。賞賚將士。和陽兵見之。必納無疑。因以絳衣兵萬人繼其後。約相距十餘里。俟青衣兵薄城舉火為應。絳衣兵即鼓行而趨。取之必矣。子興曰善。于是命張天祐將青衣兵。趙繼祖為使者前行。耿再成將絳衣兵繼後。戊寅。天祐等至陟陽關。和陽人聞廬州義兵至。父老以牛酒出迎。會日午。天祐兵從他道就食。遂誤前約。再成候之過期。不見舉火。意天祐必已進。遽率眾直抵城下。城中人始覺有兵。元平章也先帖木兒急閉城門。以飛橋縋兵出戰。再成戰不利。中矢走。眾皆潰。元兵追三十餘里。至千秋壩。會日暮。收兵還。天祐等始至。適與元兵遇。急擊之。追至和州小西門。城上抽橋急。我軍奪其橋而登。彼軍爭橋。總管湯和遽以刀斷其索。天祐等登城大呼。衣服相亂。遇舉火輒滅之。城北門舊用木柵。元兵在城外者不得入。乃燒門欲入。天祐等復以石塞其門。遂據其城。也先帖木兒倉卒無措。乘夜遁去。再

成兵既敗。其眾奔歸。報子興言。天祐等皆陷沒。子興大驚。謂上失計。俄又報。元兵且至。遣使來招降。子興益恐。召上與謀。時兵皆出。城中守備單弱。上令合滁三門兵于南門。使填塞街市。呼使者入。叱其膝行以見子興。子興喻之多失辭。眾欲殺使者。上謂子興曰。兵出城虛。若殺其使。彼將謂我怯。殺之以滅口。是速其來也。不如縱之歸。揚以大言。彼必畏憚不敢進。子興從上言。縱之往。明日元兵果遁去。子興不知天祐等已拔和州。命上率兵二千。往收敗卒。仍規取和陽。至中途。再成敗兵聞上來。皆復集。得千餘人。合所將三千人。南越徙陽關。命諸軍皆息期。初昏。人燃十炬為疑兵。令罷眾息。上率鎮撫徐達。參謀李善長及驍勇數十人徑進。暮至和陽。始知天祐等已破城據之。使人呼天祐。天祐等至。左右舉火。上免胄示之。遂入。明日撫定城中。初天祐等雖據城。懼不能守。欲收子女財物歸滁州。及上至。人心始安。乃與諸將為城守計。既而元兵來攻。自城西門踰隍轉攻城北門。上命開門擊之。元兵阻隍大敗走。遣人報子興。子興遂命上總守和陽。上雖承子興命。而與諸將未同公署。因思受命總兵。當位諸將上。然諸將子興舊部曲。皆比肩之人。而年又長。一旦居其上。恐眾心不悅。乃密令人悉徹去廳事公座。惟以木榻置于中。俟旦會以觀眾情。及五鼓。諸將皆先入。上獨後至。時坐席尚右。諸將悉就坐。惟虛左末一席。上即就坐。不為異遇。公事至諸將。但坐視如木偶人。不能可否。獨上剖決如流。咸得其宜。眾心稍屈服。時和陽城未甃。上與諸將會議分甃之計。城廣袤為十分。限以丈尺。剋日完之。諸將玩為故常。越三日。與諸將閱城。惟上所分者已畢工。諸將多未就。上乃作色。置座南向。出子興檄置于上。呼諸將于前。謂之曰。總兵。主帥命

也。非我擅專。且總兵大事。不可無約束。今壁城皆不如約。事何由濟。自今違令者。即以軍法從事。諸將惶恐。皆曰唯。由是不敢有異言。

○初諸將破城。暴橫多殺人。城中人民夫婦不相保。上偶出。見一小兒立門外。問曰。爾何為。兒曰。候我父。曰。爾父安在。曰。在官養馬。問其母。曰。亦在官門下。與父不敢相顧。但以兄妹相呼。我不敢入。故竊候之。上為之惻然。即召諸將謂曰。比諸軍自滁來。多虜人妻女。使民夫婦離散。軍無紀律。何以安眾。凡軍中所得婦女。當悉還之。明日。聚城中男子及所掠婦女于州治前。至則令婦女居內。男子列門外。兩旁縱婦女相繼出。令之曰。果夫婦。相認而去。非夫婦。無妄識。于是夫婦皆相携而往。室家得完。人民大悅。

辛巳。元兵十萬來攻和陽。上以萬人拒守。連兵三月。間出奇兵擊之。元兵數敗多死。及夏乃解去。城中復乏糧。時元太子禿堅及樞密副使絆住馬。民兵元帥陳桡先各遣兵分屯新塘高望及青山雞籠山。道梗不通。上帥師往攻之。拔其傍寨。明旦進抵雞籠山側。因解鞍假息。忽有異風來觸。上疑和陽有急。分兵還備。復假寐。俄有蛇緣上臂。左右驚告。上視之。蛇有足。類龍而無角。上意其神也。祝之曰。若神物。則棲我帽纓中。蛇徐入絳纓中。上舉帽戴之。遂詣敵營。設詞喻寨帥。寨帥請降。乃還師。未至和陽三里。有卒持矛至。言賊來攻和陽。幕官李善長督兵戰卻之。殺獲甚眾。上歸喜。因忘前蛇。坐久方悟。脫帽視之。蛇居纓中自若。乃引觴酌。因以飲蛇。蛇亦飲。遂蜿蜒繞神櫝。矯首四顧。復俯神主項。若鏤刻狀。久之。升屋而去。莫知所之。人咸以為神龍之徵。未幾。敵眾皆走渡江。

○是時。濠城舊帥孫德崖等亦乏糧。率所部就食和州四境。德崖因求入城假居數月。上慮其有他欲。不許。彼眾我寡。力不能拒。不得已許之。適有讒上于子興者。子興怒。即自滁州欲督過。上聞其將至。謂眾曰。公旦不即來。必夜至。至則語我躬迎之。既而果夜至。會守門者亦與上有隙。故不以報。先迎子興至館。始來言。上亟往見子興。子興怒。不言者久之。已而曰。汝為誰。上稱名以對。子興曰。汝罪何逃。上曰。誠有罪。然家事緩急皆可理。外事當速謀。子興曰。何謂外事。上曰。孫德崖在此。昔公困辱濠梁。某實破其家以出。公今相見。寧無宿憾。此為可憂。子興遂默然。德崖聞子興至。心不自安。明旦五鼓。遣人告上曰。若翁來。吾將他往。上大驚。疑必有變。急報子興備之。因往見德崖曰。何去之速。德崖曰。若翁難共處。故去。上察其辭色無他。因謂之曰。今兩軍合處城中。而一軍盡起。恐下人有不諧者。公當留後。令軍先發。德崖許諾。軍既發。有餞其去者。邀上與俱。因出城行二十餘里。忽城中走報子興。德崖兩軍相鬪多死者。上亟呼耿炳文。吳禎策騎而還。德崖軍先發在道者聞城中有變。又見上馳還。即來追。上躍馬疾馳。追者弗能及。頃之。遇彼軍。皆抽刀扼道。上倉猝無兵器。遂單騎入其軍。軍中多故人。一人直前忿曰。城中殺害我軍士。汝寧不預謀。上曰。吾以送友故出城。城中爭鬪。何由知之。眾弗聽。亟持上馬。銜擁而行。上曰。爾眾我寡。何用如是。有故人云。且釋銜執。銜者少縱。上即策馬疾馳。群騎急追。兵及上身。上時衷甲雖被創。而無所傷。展轉十餘里。復為短兵所及。因墜馬。顧路左適有乘馬者在旁。亦與上有舊。呼與同載。上奔躍乘其馬。共載。復行數里。遇德崖弟。麾兵欲加害。有張某者語眾曰。吾帥孫公在